


寶惜家己的性命



/ 黃慧雲

世間上值錢的物件是啥物？是真珠瑪瑙、金銀財寶？抑是身份地位、榮華富貴？咱對古早時代，皇帝四界派人咧走揣長生不老藥仔，就會常看出，世間上值錢的物件毋是別項，正是性命。因為世間人無論好額抑是散食，攏干焦一條性命。無論皇親國戚，抑是平民百姓，攏干焦會當活一遍。所以咱應該愛寶惜性命，跔踏實地、認真生活，才袂枉費天公伯仔予咱機會，來人間行一逝。

偏偏這幾年來，真濟人略略仔不如意就來想袂開，磕袂著就想欲死。掀開報紙、拍開電視，自殺的新聞滿滿是，甚至自殺的年齡層一年一年降落來，上少年的才十二歲爾呢！俗語講：「蟲惜命，鼠惜命。」性命遮爾珍貴，為啥物遐濟人會清清彩彩就來放棄？我想，in 毋是毋知影性命寶貴，是欠缺面對人生的勇氣。面對不如意的時，大多數的人會欠缺理智恰勇氣，想欲逃、想欲避，甚至想袂開。舉我個人來講，日子順順仔過的時，我會感覺人生趣味趣味；毋過一旦壓力來的時，就會感覺人生真正是苦海，毋知何時才會當解脫。

好佳哉！我有一個生活中的好模範。每擺，佇我心情齷齪，對未來失去信心的時，我攏會想著伊。一想著伊，我就閣有繼續

奮鬥的勇氣。伊毋是啥物大人物，只是我英語補習班的一個助理，叫做阿強仔。二十桶歲的伊，一出世就恰人無全，天公伯仔猶未共伊的雙手做好勢，就緊擊擊叫伊好出世。所以，伊的正手干焦正常人的一半長爾，啊倒手咧？短甲若像一支發育不良的雞腿。我若是伊，一定會想袂開。偏偏伊毋但袂失志，顛倒對家己充滿自信。逐擺去英語補習班，看著伊坐佇櫃台用半截長的正手咧拍字，閣用短甲強欲無看見的倒手咧夾物件；無論佻爾無閒，永遠攏笑微微，就會感覺，我拍無去的信心恰勇氣，又閣揣倒轉來矣。

阿強樂觀堅強的生活態度，予我了解：「人雖然袂當選擇人生，毋過會當選擇態度。」寶惜家己的性命，創造屬於家己的前途，我相信，我一定做會到。🌱